

İdris Asanin

FURSAT TAPTI...

Paravozlar sim-siya, gece qara,
Ağır-ağır fişnaylar...
Bağırılar...
Aşıqalar hırsızday.
Bu masqara
İşlerine yardımğa çağırılar.

Tirkevləri Qırımdan Qızıl Orda
Çöllərinə yetkence yüzlep qatar.
Suvday aqalar Şarqqa...
Bilmem qayda...
Kete kevsək vagonlar... Yüku-tatar.

Bu dünyağa ne oldı?
Bu ne zulum?..
Kömür olıp ateşke aqa tatar.
Qaysı devlet şay eze kendi qulun,
Etmiş ne?..
Bu halqnıñ ne suçu bar?!..

Bir günâhı bu halqnıñ —
Yurtu — cennet,
Dini — İslâm,
Qanı — türk,
Adı — tatar.
Yavurlar pek begene o yerlerni,
Fursat taptı Qırımni boşatalar!

*Qızıl Orda,
1944 s. iyün 2*

MENİM ANTIM

*“Ant etkenmen, söz bergenmen
Millet içün ölmege.
Bilip, körıp milletimniñ
Köz yaşını silmege!”
Noman Çelebicihan*

Yurtsuz qalğan hor milletim, ğurbetlikte yüresiñ,
Açlıq, qorluq hastalıqtan sürü-sürü ölesiñ.
Mezarcılar yoruldılar, cenazeler qılınmay.
Dua, hatim bir yaq tursun, ...ölgen eske alınmay.

Bir kün keçse kimse bilmey dünki qabir ne yerde,
Mezarlıqta ölülerni qaşqır süyrey kimerde.
Bunu körıp yürek sızlay, etim-tenim çimirdey,
Buña nasıl yürek çıdar, ğadaplanmay, irimey?!

Bu ğarip halq aqsız yerde mında ölip bitsinmi?
Yurtı basqan yağmacılar körip bayram etsinmi?
Millet artıq ğayıp ola, qaldı duşman şerine,
Tatar adı tarihlardan şan-şüretsiz siline.

Gece-kündüz oylanğam — bu zevalğa bir çare,
Bu accılar aqlıma neler-neler ketire!..
Nefretlenem, gönlüm taşa, közlerimden yaş keles,
Tek bir Niyet — Küreş yolu ... irademe küç bere.

Men ant etem, ant etkenniñ izlerinden ketmege,
Milletimniñ aqqı içün canım feda etmege!

*Mitan qışlağı, Samarqand vilâyeti, Özbekistan
1944 s. sentâbr*

AQİQATNI SÖYLEYİM

Açlıq, qorluq, hastalıq,
Er kün onlap mevtalar...
Nevbet tiymey cıymağa,
Aftalarnen yatarlar.

Baş ucunda etimler
Tökeler közyaşların.
Taştan-taşqa uralar
Meşaqqatlı başların.

Qıyametmi, mahşermi
Oğrağanıñ, qor tatar?..
Bu zulumnıñ astında
Bilse ediñ neler bar!..

Birevler dey: “Ya, Rabbim!
Qayda qaldı aqıqat?”
Digerleri bekleyler
Padişadan bir imdat.

Qayda baqsan — felâket,
Kim çıdar bu accığa?!..
Aldanuvlar, ümütler,
Daa beter facia!..

Mında millet yoq ola,
Yürek sızlay, iñleyim.
Öz-özümni tutamay,
Aqıqatnı söyleyim:

— Beklemeñ, siz ğaripler,
Padişadan meramet.
O zalımniñ özünden
Başladı bu qıyamet.

Emir berdi, quvdılar
Baba yurtu – Qırımdan.
O sağ ekeç, biz içün
Qurtuluş yoq zulumdan!

*Mitan qışlağı, Samarqand vilâyeti, Özbekistan
1944 s. noyabr*

BİR AVUÇ TOPRAQ

Töşekten közlerin tikip közüme,
Qartbabam: “Azizdir – ana-yurt!” – dedi.
Nefesi tutulıp, soñki sözünde
Vatandan bir avuç topraq istedi...

Sebepsiz ğurbetni hatırlap er an,
Az qala ökünip, boğula adam.
Yurtuna asretlik, menligi viran,
Ecelsiz ölümge oğradı babam.

Etrafqa köz taşlay, oylarğa dalam,
Göñülim ezile, kederim arta.
Zan etem... qabrinde zavallı babam
Bir avuç topraqqa telmirip yata.

*Mitan qışlağı, Samarqand vilâyeti, Özbekistan,
1945 s.*

YIRLA, SAZIM!

Yaşlığıñdan yırcı sazım, sen özüñe bazanıp,
Adaletten bir aq arap, aqsızlıqtan qavruldıñ.
Bu muqaddes tilegiñe siltem, soqum qazanıp,
Aziz ilham çoqrağıñdan – hor halqıñdan ayrıldıñ.

Endi aqsız incıtılıp, tilden tilge tüşip sen,
Bu amansız esarette künden-künge solasıñ.
Intılsañ da, aq sözünen aқиqatqa yetmeden,
Divarlarını buğavlağan bu zindanda qalasıñ.

Men de yaşlı közlerimni saña tikip qarayım,
Körem, yıldız söngen kibi, yavaş-yavaş sönesiñ.
Kene olsa, taqdiriñe yahşılıqlar yorayım,
Sen günasız hor halqımniñ taliyine küyesiñ.

Yırla, sazım, horlansañ da, sen aқиqat eşqına,
Söyle qavum-qardaşlarğa göñüliñniñ qarasın.
Asırlarca hışım bermey bu zavallı halqıma,
Beyaz qartal pancalağan yüreklerniñ yarasın.

Senday sadıq meslekdeşni halqım aslı taparmı?
Sen keçmişniñ facialı sırlarını bilesiñ.

Böyle aqsız parçalanğan, saçratılğan tatarnıñ
Öküniçli közyaşların iñley-iñley silesiñ.

Nesil ölse – nesil doğar, sen nesilge mengü qal,
Nesilni cet küreşlerge, oña ğayret, çıdam ber.
Nesillerni safqa çağır, hor tatarnı yolğa sal,
Seniñ arzı-istekleriñ olsun onnen beraber.

Yırla, tatar evlâdınıñ soñsuz qara yazısın,
Yırla, sazım, sen halqımnıñ vatansızlıq accısın!

1951 s.

ANA TİLİ

Doğğan yeriñ Qırım seniñ,
Er tilniñ bar doğğan yeri.
Doğğan yeriñ kibi düober,
Acayipsiñ, Ana tili!

Halqım kibi epkin, usta,
Hızmettesiñ künü-tünü.
Çeber yigit qızlarıday
Ğayretlisiñ, Ana tili!

Fenden seni ayırsa da,
Asırlarnıñ afat yeli,
Aşır Ümer, Kerem kibi
Ebediysiñ, Ana tili!

Boğaziña yapıssa da,
Sırt zulumın qanlı eli,
Çoqundırğan çağında da
Çoqunmadıñ, Ana tili!

Otqa attı, yerge qattı,
Ne yapmadı ötmış saña!
Otqa kirip, külden çıqtıñ
Sen halqımnı yaşatmağa.

Zindanlarğa taşladılar
Halqım ile birge seni.
Aqqa işanç, iradeñni
Yoq etmediñ, Ana tili!

Bu dünyanıñ incisidir
Menim aziz tuvğan İlim.
Sen olmasañ, men de yoqım...
Biñ yaşayıq, Ana tilim!

Samarqand
1964 s.

DAĞLAR

Ey, dağlar!
Ey, yeşil dağlar!..
Töpeleri aqçıl dağlar,
... demeñ dünya böyle qalır.
Bir kün sizge yolum oğrar,
Ümütlerim dönmeden...

Ey, dağlar!
Ey, mor dağlar!..
Nar qırmızı, hor dağlar!
Bu dünyada neler olmay,
Bir kün sizge yolum oğrar,
Tenim külge dönmeden.

Köre-bile susqan dağlar,
Qayğıdan qar qusqan dağlar!
Derelerde cenazesiz
Yatqanlarğa kimler ağlar,
Öz ümmeti olmasa...

Açıq mavı, quru dağlar!
Köz yetişmez ulu dağlar!
Baş taşına bir gül qoyıp,
Şeitlerge kimler ağlar,
Bir nişanı qalmasa...

Salqın suvlu serin dağlar!
Cılğaları teren dağlar!
Yat illerde sizge asret,
Hor ölgenler, em de sağlar!
... göñül taşa efkârımdan.

Ah, ne güzel sıra dağlar!
Yurtta saqçı tura dağlar.
Bir niyetim — halqım barda,
Baba Yurtum — bu mekândan
Üzülmesin bizim bağlar!

1966 s. iyül

SALĞIR

Salğır aqa gece-kündüz
Biñ intizar çeke-çeke.
Qave renki köpüklerin
Yalılarğa töke-töke.

Salğır aqa, deşetlene,
İradesi demir kibi.
Saillernen pancalaşa,
Bir küreşçi ömür kibi.

Salğır aqa Azavğa! – dep,
Kâ qabara, kâ yatışa,
Qayalarğa uruna da,
Efkârından çölge taşa.

O deñizge qavuşmaqçün
Qayta-qayta qanatlına.
Qavuşqan soñ, dersin, ana
Quçağında raatlana.

Salğır, men de aqşam-saba
“Vatanım!” dep çalışmaqşam,
Qayalardan daa suvuq
Aqsızlıqnen çarpışmaqşam.

Taraq tişli divarlarını
Tırnağımnen devirirdim.
Kirişteki Baş qulleni
Astın — üstke çevirirdim.

Salğır, bil ki, bala edim,
Yurt nazına toymadım men.
Taqdir senden ayırsa da,
Yurt sevgisin coymadım men.

Kördim seniñ ğayretiñni,
Bir ot tüşti bedenime.
Seniñ parlaq iradeñni
Örnek etem men kendime.

1967 s. sentâbr

BAĞÇASARAY

Qayalar seslene sesi bar kibi,
Qaranlıq dereler deñizden teren.
Taşları saqaylar yadikâr kibi,
Tatarnıñ silinmez ayaq izlerin.

Salaçıq yolları, Savuşqan deresi,
Ne qadar levhalar ketirdi fikrime...
Sağımda Geraynıñ aq mermer dürbesi,
Tarihlar saf olıp kirmekte zikrime.

Qırlarğa tırmaşqan yolları uzun,
Enişi, yoquşı salıncaq kibi.
Çalışı, çimeni, yosunlı taşları
Güzeller boynunda boyuncaq kibi.

Er yolnıñ başında ötmışten bir iz,
Kâde bir körüne mezar taşları.

Bu yollar, qart dağlar, qabarğan deñiz –
Ezilgen tatarnıñ silâdaşları.

1971 s. iyün

BAĞÇASARAYDA

Mına şeer asırlarca
Avropağa qorqu saçqan,
Qıpçaq İli, Qızıl Yardan
Aq deñizge yollar açqan.

Mında mermer minareler
Qadalğanlar mavı kökke.
Beyaz-qoñur qayalarğa
Küneş altın nurun töke.

Onıñ namı, şan-şüreti
Endi çoqtan elden ketti.
Sırttan qopqan qattı boran
Barlıgını viran etti.

Onıñ sırlı çeşmesinden
Aqıp tura közyaşları.
Han Sarayı, darma-dağın,
Sınıp yata baştaşları.

Çoq asırlıq ğarez duşman
Bunu körıp ferahlana.
Bağçasaray bu alıña
Gönlüm taşa, yürek yana.

1972 s.

EY, VATAN

Bar ömür ıntıldım,
Men saña, ey, Vatan!

Ne tañrı ses berdi,
Ne zalım padişa.
Kimlerge söyleyim
Yurtsuzlıq derdimni,
Aqsızlıq otunda
Bedenim tutaşa.

Kün qona,ayaqlar
Kölgege sürüne,
Çatırnıñ çeresi
Qarağa бүрüne.
Bu yerler közüme
Kelinday körüne,

İrisem, bitsem de,
Yurtumdan keçmedim.

Ağarmış artından
Altın tūs Ay çıqa.
Sanarsıñ, perdeden
Közyaşlı yar baqa,
Asretli göñlümni
Ayrılıq ep yaqa,
Ezilip bitsem de,
Yurttan vazgeçmedim.

Üzlüksiz ölse de,
İcransız bu devran,
Horlanmış canlarını
Tapılır yandıran.
Küçlenir kölgeler,
Teprenir bu cian,
Yahşı bil, sen tiran,
Men yurttan keçmedim.

Sağ ekeç, könmedim
Men matem yasına,
Uzun söz kerekmey
Menim baş taşıma.
Tikenler tolsa da,
Sevgimniñ tasına,
Yaralı göñlümni
Bermem başqasına,

Azizim,
Vatanım,
Men senden keçmedim,
Eñ qattı uruştan
Daa vazgeçmedim.

1974 s. avgust

BAŞ TAŞI

Ey, tilsiz baş taşı,
Bir kesek mermer!
Sen ötmüş ömürden
Söyle bir haber.
Çıdap bu küneşke,
Yağmurğa, yelge,
Kimni şay örtesiñ,
Bu hizmet kimge?
Kimge sen ebediy
Saqqılıq etesiñ?
Kelecek nesilge
Ayt, neler cetesiñ?

Kimdir o astında
Davuşsız yatqan,
Bu suvuq mermerge
Sözleri batqan?
Eger sen taş yürek
Namerdni qorasañ,
Ruhuna yolcudan
Bir dua sorasañ,
Taşla o alçaqñı,
Yatsın öz başına.
Özüñ de çeviril
Qaldırım taşına.
...Eger o Yurtunı,
Halqını sevgen,
Bir aziz niyetçün
Er şeyge köngen,
Bugünniñ tañında
Yarınñı körgen,
Kelecek oğrunda
Topraqqa döngen
Er ise, menden de
Ruhuna ramet,
Özüne, işine
Sınırsız ürmət!

1976 s.

DOSTUMA!

Yosmam, taqdir silteminen
Bir belâğa çatsa başıñ,
Efkârlarıñ ezip seni,
Közleriñniñ kelse yaşı,
Yañğızım dep, oylama iç
Çağır meni, çağır meni.

Ömür yolu tegenekli.
Ola bilir, aq işiñe
Aks etip, felek seniñ
Ayaq çalar küreşiñe.
Yañğızım dep, oylama iç
Çağır meni, çağır meni.

Taqdir yaltaq, ğadderane,
Terslik eter maqsadıña,
Köküsiñden bassa seni
Aslı razı olma oña,
Yetişirim imdatıña,
Çağır meni, çağır meni.

Taliy küsse – ömür çeke
Aqibetin sezdirmeden,

Yıqmaq ister fursat seni
Aq göñülni ezdirmeden,
Dalma, ğafil deryasına
Çağır meni, çağır meni.

Aq küreşi şaqə degil.
O er şeyden meşəqatlı.
Eger ecel yıqsa seni,
- Yeñilmekten ölüm tatlı
Niyetiñe qurbanım men,
Çağır meni, çağır meni.

1976 s.

İSTİQBAL KÜREŞİ

İstiqbal küreşi degil bir oyuncaq,
Menimce bu yolda yanmalı er çıraq,
Bir sefer başladıq uzundan em uzaq,
Kerige yol yoqtır, yol yoqtır kerige
Ketmeli ileri, ileri... Ancaq
Bu yollar uçurım, meşəqqat olacaq.

Elvida! Anayım, sarılma sen maña,
Men ketem halqımniñ aqqını sormağa,
Şərəfli niyetke vicdanım çağıra,
Kerige yol yoqtır, yol yoqtır kerige
Ketmeli ileri, ileri... Ancaq
Bu yolda amansız küreşlər olacaq.

Şübesiz bu yolda baş yarar taşlar,
İncinğan közləri yaqar közyaşlar.
Sebepsiz aqaret yürekni aşlar,
Kerige yol yoqtır, yol yoqtır kerige,
Ketmeli ileri, ileri... Ancaq
Bu yolda çıdamlı yigitler qalacaq.

Kimniñ bu küreşte çıdamı yoq ise,
Muqaddes niyetke imanı yoq ise,
Qalır o kenarda söngen çıraqday,
Milletniñ alından habersiz-uzaqday,
Biz içün bu soñki sınavlar olacaq.
Bu yolniñ soñunda adalet doğacaq!

Ketmeli ileri, ileri... Ancaq
Bu yolniñ oğrunda adalet doğacaq!

1976 s.

T...ĞA!

Küneş yorğun yerge ene,
Nurlarını tökip gülge.
Erte saar qayta kene
Sanki aşiq tuvğan İlge.

Sen dünyanıñ işine baq,
Can sevgiden ğıda ala.
Sevmegen, ya sevlmegen
Yañğız doğa, yañğız qala.

Etme, güzel, bir ömrüni
Bir sebepsiz böyle perşan.
Çin sevginiñ sefasından
Bu dünyada qalsın nişan.

1978 s.

HALQIMA

Vicdanı temizler siltemden uzaq,
Temizsiñ – lekeler yapışmaz saña.
Dağ seli astında qalsa da çoqraq,
Çoq keçmey arınır, inanam oña.

Ecdadım keçmişte ant-yemin etip,
Ölümge kettiler namus, ar için,
Şanına kir tiyse, er şeyden keçip,
Qaninen yuvdılar özünüñ suçun.

Şan satılıp alınmay, o – büyük Miras!
O – vicdan, o – emek, o – mañlay teri!
O tatlı ömürden qıymetli biraz,
O – keçmiş, o – bugün, o dönmez kerı.

Eminim aqiqat saña da küler.
Şübesiz, adalet o seniñ Aqqıñ.
Bu çelik niyetni qıtalar bile.
Yaşamaq borclusıñ, sen aziz halqım!

1978 s.

ŞAİRNIÑ ÖLÜMİNE

Öldi şair,
Yumuldı aqsızlıqqa
Nefret ile qarağan ötkür közler.
Müürlendi yatlarını qıyratqan til,
Yoqtır artıq salmaqlı keskin sözler.

Öldi şair, yata o yavlar basqan
Ana yurtnın töründe bizden uzaq.
Baralmadım qabriñe gül qoymağa,
Yurt yolunda tiklendi biñlep tuzaq.

Ketti şair yaltaqlar dünyasından
Davet etip bizlerni halq işine.
Dedi: “Dostlar, beklemeñ siz aqiqat
Qoşulmadan adalet küreşine”.

Yoqtır artıq, qırıldı aq qalemi,
Hor halqına berilgen coşqun yürek.
Artıq urmay, toqtadı şay vaqıtsız.
Yas siltemge ne qadar çıdam gerek?

Söndi artıq, yumuldı adaletçün
Asırlardan ileri baqqan közler.
Qayta-qayta dedi o: “Coyulmasın
Atalarınñ mirası – şanlı izler”.

Yoq, ölgeni yoqtır o, şair yaşay,
Şair halqnıñ küçüne qoşa küçün.
Qırımlınıñ yüregın eñ töründe
Küreşlerge çağıra vatan içün.

Şair bugün biz ile, aramızda,
O satqınlar sürüsın ep kötekley.
Yanıq yürek topraqta suvumadı,
Şair bizni çağırıp, yurttı bekley.

1979 s.

TAMÇILAR

Bir tamçı — ne demek?!
Biz közge ilmeymiz.
Tamçığa sebep ne, aslına irmeymiz.
Siyarğan, yağacaq buluttan tamdımı?
Ya ötken afatlı borandan qaldımı?

Bir tamçı...
Esame... deymiz biz er yerde,
Lâkin kel, fikir et, sınaq kör kimerde,
Unutma, tamçılap taşların oyğanın,
Yüksekte cem olıp, çelekten quyğanın.

Köz yetmez dağların şıpırıp yüzüne,
Qayanıñ, bayırnıñ soqulıp negzine,
Deşetli küç ile temelni kemirgen,
O titis yarlarını tamçılap devirgen.

Bir tamçı – tamçıdır,
Lâkin o tamçılar
Yağmurğa çevrilse, yüzüñni qamçılar.
Temeli tamçinen yuvuğan saraylar,
Çoq keçmey, mıtlaqa būs-bütün omraylar.

İsterim, tamçılar sel olup, taşcınlap,
Qabarıp, köpürüp, deñizge aşsınlar.
Bu viran yarlarnıñ túbüni oysunlar,
Dereniñ, cılğanıñ çöplügin yuvsunlar.

1980 s.

RUYALAR

Ah bu tüşler, tüşteki zevq ayt nede bar?
Qaydalarğa alıp barmay bizni tüşler
Tıñmay çalıp yetilmegen çoq niyetler
Ömür boyu bitmey aytqan bir çoq işler
Kerçeklene çoq kimseniñ tüşlerinde
Aqiqattan uzaq qalğan işleri de.

Faqır tüşte namılı ketken büyük bir bay,
Zadikânca quşanğan o dersin sultan
Keyf yerinde suvuq sıcaq abaylamay
Pervası yoq ne borandan, ne afattan.
Suv boyunda bağçalıqta büyük saray,
Astı kilim, divarı hal odalarda
Etrafında hizmetkârlar dolanalar
Azbarında soyu düldül atları bar.

Hanlar da şay ruyasında yoqtır iç ğam,
Ayat zevqı!... Ne isyan bar, ne cenkleşe,
Ne tahtına hast etken bir yaqın tuvğan
Ne avam halq aqqın sorap kötekleşe
Er kes oña baş egmekten iç bir sözsüz
Memlekette qalmağan şay qırsız, yüzsüz.

Sevgisini qoldan bergen yigit deseñ,
Yuqusında asret çekken yarın köre,
O qarşıdan, ruh yerinden körümi şeñ,
Qolun cayıp quçağına kelip kire.

Men ğarip de, faqat tüşte tapıp ara,
Safdaşlarnen birge kete küreşlerge
Zalımlarğa darbe berip ardı-sıra
Qavuşamız halq oğruna yeñişlerge
Eñ muqaddes maqsadımız er bir işte,
Bizge birlik, ğayret bere bu yeñişte,

Deymiz: “Artıq biz qazandıq musaviy aq,
Köz aydınlar olsun saña ey aziz halq!”

*Moskva,
1998 s. sentâbr*

ANAMNIŇ DUASI

Gönlünde kâ sevinç, kâ teren ğam,
Ömür boyu dualar etti anam.
Dey edi o: “Kin tutıp, ya intiqam
Günalarğa batmasın iç bir insan.”

Taňrım, saqla saña sadıq ruhumızın,
İrit afat dağınıň qarlı buzun.
Bitmez olsun dünyada insaf ve ar,
İnsan körsün insandan itibar.

O yürekten ibadet ete edi,
Künü faqat duanen öte edi.
Adamlarınıň müşkülün anam
Kendi meşaqqatı, derdi zan ete edi.

O bir dağın túbünde, küçük köyde,
Yaşay edi eski güzel bir evde.
Köre edi o mindan kâinatın
Hayal ile dünyanıň yedi katin.

Duasını küçüne ğarip anam,
Can yürekten isana, hana edi.
Bu dünyanıň azğanı, batqanına
Ateş alıp yürekten yana edi.

Qabul olur duası er sözünde,
Anam buña şübesiz, ketti emin.
Hayal etem, o simdi köz ögümde,
Bası töben, secdede, ruhuna Amin!

EY, BÜYÜK OCAMIZ!

İsmail beyniň qabri başında.

Ey, büyük ocamız! Köter başıñnı,
Baq, kene keldik biz – nesiliň, mindamız!
Yıqsa da melunlar mezar taşıñnı,
Biz seniň iziñni ebediy coymamız!

Senden kördik nur, senden – şifa,
Senden – sadaqat em soñsuz vefa.
Esapsız olsa da biz körgen cefa,
Bizler “Aq yolunda küreşten talmamız!”

Çoq yıllar nuruñdan biz marum qaldıq,
Üç nesil sürgünde ep seni añdıq.
İşte baş ucuñda kene toplandıq.
Eminim, biz sensiz bir an da qalmamız!

Baq, bugün bu yerde — er zorğa köngenler,
“Yurtum!” – dep küreşken, köküsin kergenler.
Bu yerde – ayatın milletke bergenler.
Kim bunu añlamay – esapqa almaymız!

Keçtik biz sahralar, ayazlı dağlardan.
Mahsus qurulğan tuzaqlı ağlardan.
Selâmlar ketirdik ölgen emsalardan.
Tökülgen tolmaycaq, biz bunu añlaymız!..

Küç berir bizlerge zorluqlar, müsibet.
Meşaaqqat dünyasın ahırı yoq, ebet.
Kene de emelge etermiz, bu – Niyet.
Biz artıq ibliske tekrar qul olmamız!

Yolumız – Türkiylik, aqiqat yoludur,
Ötmiş em kelecək şan ile toludur.
Bu yoldan çekilmek ayatnıñ soñudur.
Ey, büyük Atamız, iziñden qalmamız!

Ocam! Biz qavuştıq, ötse de çoq yıllar ,
Kelirmiz aldıña, otaymaz bu yollar,
O deşet yılları keride qaldılar,
Eminim, köstergen yoluñdan taymamız!